



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

**PM Modi-i Cyprus, Canada aser
Croatia linüktem semdangtsü**

**Kevin de Bruyne Napoli
nung denogo**

VOL. XXII ISSUE NO. 241 (ADOK 241)

DIMAPUR

AMUNGNÜ (SUNDAY)

AAMI (JUNE) 15, 2025

₹ 5.00

Israel-i Iran maneni amaktsü metetdaksür

Tel Aviv, June 14, 2025

(Agencies): Israel-i Iran amakba sülen Honibarnü linük ana tsüngda missiles aser airstrikes liogo. Yashi Israel-i amakdang commanders aser scientists tepset aser nuclear sites aika raksatsü.

Tehran nung housing complex ka amakdang tanur 20 dena nisung 60 tepsetogo ta Iranian state TV-i metetdaksü.

Iran-i missiles aika yokba ajanga Israel nunga air raid sirens asaten aser missiles poksatsü atema interceptors yok. Iba mapang nisung asem tashi asü.

Iran-i ballistic missiles 200 shi khaloktsüogo ta Israel ketdangsür kati ashi.

Israel-i Iran amakba atema US President Donald Trump-i tenüngsang agütsüogo. "Iran-i parnok nuclear programme downgrade asütsü ashiba agizüktsüla" ta Trump-i ashi.

Israel-i operation tenzükba ya hopta ishika agitsü akok ta ashir aser parnok Iran nung dang Islamic clerical yimsüsürtem anema noktaksü ayongzükogo.

Israel den tongti süa yariteper United States-i Iranian missiles khasatsüogo ta US ketdangsürtemi ashi.

Iran-i Israel nung residential districts amak aser iba ya magizüker ta Defence Minister Israel Katz-i ashi.

"Iran Supreme Leader Ayatollah Ali Khamenei-i Israel nung ki nung missiles

khaloktsüra Iran timtemtsü" ta pai ashi.

Külen, Iran-i tayang küpzüksü nangzükogo. Israel-i amakdang Iran nung nuclear aser military lenir aika tepset, atomic plants aser military bases raksatsü aser civilians dena nisung 78 tepset.

Iran-isa Israel den yaritepertem dang Iranian missiles khasatsüra parnok amaktsü ta metetdaksüogo.

Israel-i Hokolbarnü 'Operation Rising Lion' kübok Iran nung airstrikes asüdang Chief of Revolutionary Guards Hossein Salami aser Chief of staff of the armed forces Gen Mohammad Bagheri na dena tongti ketdangsür aika tepset.

Iran indang nuclear programme 'point of no return' atongba osang angazükba agi amak ta Israel-i kuli agütsür.

"Iran-i Israel samatsütsü amokmerenba agientsü atema military operation inyaker. Iba lendong agientsü atema iba operation anogo aika inyaka aotsü" ta Israeli Prime Minister Benjamin Netanyahu-i ashi.

Külen, Iran Supreme Leader Ayatollah Khamenei-ia Israel madak tashi amshitsü aser tayang küpzüksü nangzükogo.

"Israel-i iba ya tembangogo ta mebilemtsüla kechiyong parnok iba rara tenzük. Iba ozüng alema inyakba mapa tulu nungi parnok mejenbudaktsütsü" ta Khamenei-i metetdaksü.

Air India pilot-i tayimtsü nung timtem aliba osang agütsü

New Delhi, June 14, 2025

(Agencies): Ahmedabad airport nungi London-i aoba tayimtsü ka apusor minute ishika dang lir tsükok aser lendong matalokdang Air India pilot-i Air Traffic Control (ATC) dangi "Thrust not achieved", "falling", "communication line during this transmission very weak", "Mayday" ta osangtem yoka liasü.

Air India pilot-i ATC dangi osang yokba nung Flight AI171 nung timtem ka liasü ta angateter. Brihostibar nikongdang 1:37 ako nung Sardar Vallabhbhai Patel International Airport nungi iba tayimtsü apusoa ao.

Iba tayimtsü ya London nung Gatwick airport nung anenzüksüba liasü aser nisung 242 mena liasü. Tayimtsü nung mena alirtem rongnung passengers 230, pilots 2 aser

crew members 10 liasü aser nisung ka jenbu.

Aircraft Accident Investigation Bureau (AAIB)-i iba lendong atalokba sülen ghonda 38 tsüngda Air India plane indang black box 28 ngutetogo ta Union Minister of Civil Aviation Ram Mohan Naidu-i Hokolbarnü metetdaksü.

Iba lendong atalokba sülen Air India nung Boeing 787-8/9 fleet ajunga Deobar nungi safety inspection tenzüksü ta Civil Aviation Ministry-i ashi.

Directorate General of Civil Aviation (DGCA) ajanga tayimtsütem nung fuel, engine aser hydraulic systems reprangtsü tetuyuba agütsüogo.

Air India Flight AI171 indang black box data reprangdar aser telok balalai lendong atalokba bushisüngdang südar ta Civil Aviation Minister Naidu-isa ashi.

Centre nung BJP sorkar ajanga linük kanga renlok daksüogo



Dimapur, June 15, 2025

(TYO): Centre nung BJP-i aniba sorkari tesüiba küm 11 tashi ketdangsüa arudang India loktiliba nung temelenshi tulu bener aruogo ta Nagaland BJP MLA & PHED minister Jacob Zhimomi-i ashi.

"Tesüiba küm 11 tashi Centre sorkari welfare schemes tenzükba ajanga teküpoktiba jenjang nung alirtem nem terenlok bentsür aruogo aser parnok pei sasa liteta aoer" ta Jacob Zhimomi-i Dimapur nung osangbener den jembidang ashi.

"2014 nungi iba linük nung socio-economic tsütsü temelenshi bener arutsü tenangzükba yur inyaksangshitsü tenzükba liasü. Tanübo nisung million 270 tashi sensaktia nung aliba nungi anitetogo aser iba ya Prime Minister Modi'er sorkar policy tem ajanga lir" ta pai ashi.

Tesüiba nung sorkar welfare schemes inyakba nung tashishitsü aika liasü saka tangbo Direct Benefit Transfer ajanga

sensotem keti senotsü indangindanga aoer. Iba ajanga sorkar ketdangsübaren nung tashishitsü melii ochishia inyaker ta Jacob-isa metetdaksü.

Modi'er sorkar ajanga inyakyim melenshiba ajanga rongsenketzung tashi itta kümogo. Tanü India ya alima nung fourth largest economy lir aser third world rongnung most powerful economic nation akümtsü tejangraba lir ta paisa ashi.

India pei sasa liteta aotsü atema Aatmanirbhar Bharat kübok maparen aika tenzükogo aser iba ya 2014 nungi Modi'er sorkar indang tongtipang policy tem rongnung ka lir ta Minister Jacob-i ashi.

India Prime Minister-i 2047 tashi nung Viksit Bharat kümdaktsütsü nükjidong yur mapa inyaker ta paisa shisem.

BJP MLA aser Tribal Affairs & Election Advisor Tovihoto Ayemi-ia Viksit Bharat 2047 omen indang tatsü lemsatap.

Taoba hopta Heads of Departments (HODs), tongti ketdangsürtem aser district administration officials ketdangsürtem den senden ka menogo. Iba senden ya "Viksit Bharat 2047" den putepa "Viksit Nagaland" atema amen ta Tovihoto-i ashi.

Sorkari Nagaland renloktsü atema asalentong ka renemer aser asenoki iba külem nükjidong atongtsü atema linük den külemi yaritepa inyakttsüla ta paisa ashi.

"India nungeri Modi'er sorkar dak tamang akar aser iba ya sorkar ketdangsübaren ajungba ajanga lir. Centre nung BJP sorkar kübok India tejakleni aoba dang masü saka state tem nung BJP mesüra BJP den yaritepa sorkartem lir, item state nung terenlok aliba angur" ta paisa shisem.

"Iba ajanga BJP-i terenlok, sorkar ketdangsübaren tajung aser sensakertem ajungkettsü atema bendanga agütsüba kuli agütsür" ta Advisor Tovihoto-isa ashi.

Dimapur airport ali atema nisung 25 anema chargesheet benokogo

Dimapur, June 14, 2025

(TYO): Dimapur airport ali atsünga agiba bushisüngdangtsü atema tentetba SIT-i nisung 25 anema chargesheet ka benokogo.

SIT-isa Nagaland personnel & administrative reform (P&AR) department aser Land Record department dang nungi sorkar mapa inyaker 6 anema bushisüngdang asütsü temelaba meshir.

Home Department-i tetuyuba agütsüba ama SIT-i ali atsünga agiba ken o bushisüngdang tenzük. Ali atsünga agirtemi kulikaket nung teka aiba aser taila yangluba atema tai tongloka lir ta Nagaland police-i ashi.

SIT-i bushisüngdang tenzük arudang ozüng alema inyaksangshiba bushitet aser iba nung ajemdaker State Crime Police Station, Police

headquarters Kohima nung FIR ka benok.

Ketdangsürtemi kuli ajak reprangdangba sülen tai tongloka alir nisung 31 anema charge-sheet benoktsü shidang. Parnok rongnung sorkar mapa inyaker nisung 6 densema lir aser IPC kübok criminal conspiracy, cheating, forgery, & other criminal acts kübok ken o benok.

Bangdakpur dang nungi temelaba anguba sülen SIT-i Dimapur nung nisung 25 anema chargesheets benokogo ta Nagaland Police-i metetdaksü.

Hokolbarnü Dimapur aser Chümoukedima district administration-i Dimapur airport ali atsünga agia alidak eviction drive ka inyakogo.

State sorkari tetuyuba agütsüba ama Dimapur aser Chümoukedima district

administration, police aser bangdak department-i Hokolbarnü Dimapur Airport ali atsünga aliba meyipa agitsü mapa inyak.

Dimapur Airport ali acre 17.9 meyipa agitsü atema iba mapa inyak aser Dimapur o Chümoukedima nungi independent observers lia inyakogo.

Independent observers rongnung Dimapur aser Chümoukedima nungi kin teloktem, CSOs aser temeket aliba Village councils dena liasü.

"Iba tesem nung nisung 22-i ali atsünga agi saka kiojen 24 liasü. Iba nung RCC buildings 4, semi-pucca building 3 aser thatch houses 17 dena liasü. Parnok nem anogo 15 agütsü aser iba sülen ano grace period agüja liasü" ta Dimapur DC Tinojongshi-i yashi ashi.

Mokokchung nung azüh tenlaba anogo among



2th Assam Rifles, Mokokchung District Hospital nung World Blood Donors Day amongdang sentong nung shilem agirtem aser azüh tenlartem külemi tangokba noksa.

Mokokchung, Aami/June 14(TYO): Tanü Mokokchung nung 12th Assam Rifles, Mokokchung District Voluntary Blood Donors Association, Blood Center IMDH aser DAPCU semtepa

World Blood Donors Day sentong 12th Assam Rifles, Mokokchung District Hospital nung ayongzüka kaogo. Tanü iba World Blood Donors Day sentong ya "Give Blood, Give Hope, Together We

Sanes Life" Omen nung ajemdaker kaogo aser nisung 20-i angati azüh tenla agütsüogo ta Dr.R.Toshimenla Jamir DTO & DPO Blood Safety, Mokokchung ajanga metetdaksü.

CM aser Angh nungeri asükhu lemsatep

Dimapur, Aami/June 14 (TYO): Nagaland Chief Minister Neiphiu Rio-i sangdong ka ajanga Pelezotuo Mezhür Sekhose asüba osang angazüka mang ayimba lemsatepogo, shiba nüburti Atuo Mezhür ta jangja lir.

Asür Mezhür ya lokti nung tongtoibang nisung ka liasü, shibai education, saisapong aser lokti tenzüka nung tongtibang shilem agiogo. Pa ya Commonwealth War Graves Commission kübok North Eastern Region Regional Manager, international tetoktepba tem nung Indian Football Team Chef-de-Mission, Bharat Scouts and Guides State Commissioner, Mezhür Higher Secondary School Managing Director aser Baptist Mission Church Executive Council mendenbuba liasü.

Saisapong nung pa mezünpur ka liasü aser pai All India Football Federation tatongtir mapa dena benogo. Pa asüba ya Naga nunger atema takoksa tulu lir.

Sorkar aser ozü kibong tenüng nungi ni asür kinungertem den asükhu lemsateper. Asür tanüla teti tatem makadak anisüngzükdakjang ta aser mangyimjashi mapang asür kibong den Tsüngrem taochi denang ta sarasademtsür, ta CM-isa ashi.

Kasa mapang nung Nagaland Angh La. Ganesania Nagaland Bharat Scouts and Guides State Chief Commissioner Pelezotuo (Atuo) Mezhür Sekhose asüba osang angazüka temulung koremba lemsatepogo. Asür Atuo ya educationist, administrator aser lokti nisung ka liasü, shibai Nagaland nung aliba nüburti tenzüksü atema pa taküm bendanga agütsüogo.

Paisa, shisaliok, saisapong aser lokti tenzüka wadang nung anibelem mesasai inyakba kodanga mamatoktsü, ta ashi.

Ni asür kinungertem den asükhu lemsateper aser tulusang Tsüngremi parnok nem anisüngzüka agüjang ta sarasademtsür, ta Angh-isa shisem.

Maneni Nagaland Olympic Association Secretary General aser Athletics Federation of India Vice-President Abu Metha-ia Atuo Mezhür asüba osang angazüka mang ayimba lemsatepogo.

Mezhür-i taküm aliba mapang lenla aika nung aser talisa saisapong nung tongtibang shilem agiogo. Saisapong nung pa mapa ajanga pai lanurtem aser asaya nung temaba jenjang tongtettsü atema bendanga agütsüba sayur.

Pa taküm alidang mapa aika benogo, kong All India Football Federation Vice President,

Nagaland Olympic Association General Secretary, Nagaland Football Association tir, Nagaland Table Tennis Association tir mapa abenba densema lir.

Pai otsüsütsüsa ajangzüktetba mapatem rongnung Mauritius, England aser Northern Ireland nung international asayamung tem nung Indian Football Team Chef-de-Mission inyakba aser Australia nung FIFA Conference mapang India tenüng nung oa adenba densema lir. Pa lenisüba nung Indian football team-i 2004 küm UK nung Ian Rush Trophy koka liasü.

Asür Mezhür-i lanurtem ajungkettsü aser Nagaland nung asayartem noingita yaritsü atema anibelem mesasai inyakba ajanga tanü asenok maongka aika agir. Pa teti bilemtettsü aser Nagaland nung Saisapong puti otsü nungi maitoktettsü.

Nagaland Olympic Association aser Nagaland nung sports fraternity ajunga tenüng nung ni asür kinungertem den asükhu lemsateper aser tulusang Tsüngremi parnok nem anisüngzüka aser tashi agüjang ta sarasademtsür. Asür tanüla teti tatem makadak anisüngzükdakjang, ta Metha-isa shisem.

CEDAW dak sendakba nung Workshop ka agiogo

Dimapur, Aami/June 14 (TYO): Sisterhood Network (SN) aser International Indigenous Women Forum (FIMI) na longjemer Collective Learning Convention on the Elimination of Discrimination Against Women (CEDAW) aser General Recommendation No.39 (GR 39) dak sendakba nung workshop ka June 12 nü Tourist Lodge, Dimapur nung ayongzüka agiogo.

Indigenous tetsürtem aser aiür chanutem temeden dak sendakba nung tangazükba agütsütsü nükjidong nung iba workshop ya ayongzüka agiogo.

Iba workshop indang facilitator ji Renemsongla Ozukum liasü aser SN Program Coordinator C. Pihola Sangtam lenisüba nung iba sentong agi.

Workshop nung SN, Nagaland State Commission for Women züngsemtem, Women Police, Arogo balala nungi lenirtem, District Hub for Empowerment of Women, Social Workers aser Research Scholar temi shilem agia liasü.

Renemsongla-i tetsürtem temeden ajungkettsü atema CEDAW Committee-i jenjang agibatem aser National

Women's Commissions aser civil society organizations koda tongtibang iba indang lemsatep. Sensaksem ya General Recommendation 39 (GR 39) dak rangloker agi.

Laisa, tetsürtemi pei temeden jangja alitsü aser talisa parnoki tetsükdaktsü balala ajangshibatem indang jangja alitsü koda tongtibang iba indang lemsatep. Laisa, classism anema jenjang agitsü aser indigenous maitsü mesamadaktsütsü atema tebandang maliba lokti ka ajungkettsü koda tongtibang iba indang lemsatep.

RUBBER FARM TAYOKTSÜ LIR

Tzüdikong (Tuli Paper Mill 10th mile), main road nungi furlong ka shi pilar Rubber Farm (süngdong 500 shi), tang rubber teyimdak tayoktsü lir. Talitsü ki (RCC), smoke house, rubber machine aser osettsüset ajak peria lir. Talineri kibur den (no broker) agüja aliba contact number den tongtepratepangma

CONTACT: 9436828848 / 8118949875

Assam Rifles-i sentong balala ayongzüka agi

Dimapur, Aami/June 14 (TYO): Assam Rifles aser Christian Institute of Health Sciences and Research, Dimapur na longjemer June 14 nü Medziphema nung azü tenlaba sentong ka ayongzüka agiogo.

Iba sentong nung World Blood Donor Day nüngdem nung sepai 108-i azü tenla agüja liasü. Iba sentong nung Assam Rifles personnel temi kanga jangrabangra shilem agiogo, koba Unit Hospital, Medziphema nung agia liasü.

Kasa mapang nung World Blood Donor Day amungba nüngdem nung Assam Rifles-i, New Thewati yimtsüng nung aliba lanurtem aser tanurtem atema awareness sentong ka ayongzüka katsüogo, kong azü tenlatsü koda tongtibang iba indang lemsatepa liasü.

Sentong nung lanur aser tanur 53-i shilem agi, kong fun facts tem lemsatepba, quiz, sensaksem aser azü tenlaba ajanga tajangzükem indang tangazükba agütsüba densema lir.

Maneni Assam Rifles-i, Assam Rifles Public School (ARPS), Phek kaketshirtem atema hopta ka asoshi summer camp ayongzüka katsüogo, koba June 13 nü tembanga liasü.

Camp nung tanur 55-i shilem agi, kong Talent Hunt, Painting tetoktepba, jepdak o jembi, survival skills, trekking, rock climbing, obstacle course, weapon/equipment display, waste management, süngtong atemba, local tribe tem semdangba, local orphanage semdanga sensak asemba amala sentong balala densema liasü.

Peren District nung World Blood Donors Day mungogo



Jalukie Town Council Councillor Namdatbou-i sentong nung o jembiba noksa nung angur.

Dimapur, Aami/June 14 (TYO): Peren District nung June 14 nü "Give Blood, Give Hope: Together we save lives!" omen nung ajemdaker CMTC Hall Jalukie Town nung World Blood Donors Day mungogo.

Iba sentong nung Jalukie Town Council Councillor Namdatbou alakteta jaoker liasü. Sentong nung o jembiba mapang pai, nisung taküm kümzüka aser asen lokti ajangzükdaktsütsü atema mapa tajung inyakba atema pei mulungka nung azü tenlartem nem tenügsang agüja liasü.

Paisa, Peren District Voluntary Blood Donors Association aser Indian Red Cross Society dang azü tenla agütsüba aser Blood safety indang yimtsüngtem nung tangazükba agütsütsü ajangshia liasü.

Sentong nungsa SMO, DH, Peren aser Chairman IRCS (N) Jalukie Sub Division Branch Dr. Hedungkiebe-i Basic Blood Science onük nung ajemdaker jembi aser MO, FIARTC CHC, Jalukie Dr. Ramheigum-i, azü tenla agütsütsü koda tongtibang iba indang jembi liasü.

Kasa mapang nung Principal St. Xavier College Jalukie Rev. Fr. Francis-i, kaketshirtemi

tasütait jenjang agia azütenlaba aser taküm kümzüka atema tenügsang agütsü. Paisa, sentepa aliba lokti dang, azü tenla agütsütsü atema asen taküm merekteta ayutsü ajangshia liasü.

Sentong nung Associate Pastor, Youth, Ao Baptist Arogo Imtilong Morgro-i Tsüngrem temaotsü meshizüka sarasadema liasü.

Maneni sentong nung PDVBDA tir asür Ngauzeulungbe nem tetushi agütsüba mapang agia liasü. Sentong ya DPO, DISHA Peren Rovikphoto Mor lenisüba nung agi aser Program Asst, DISHA Pauheugau-i tepela o jembi liasü.

IRCS Jalukie Sub branch, Councillor, Jalukie Town Council, St. Xavier College Jalukie Town aser Baptist Hr. Sec School nungi kaketshirtem, ICTC Councillor CHC, Jalukie aser Mobile ICTC staff temi iba sentong nung shilem agi.

Azü tenla agütsüba sentong ya Nagaland State Blood Transfusion Council-i nongita yaria Peren District Voluntary Blood Donors Association aser Indian Red Cross Society, Jalukie Sub branch nati ayongzüka agiogo.



June 14, 2025 nü Dehradun nung Indian Military Academy nung Spring Term 2023 passing out parade sentong nung Sri Lanka Army Commander, Lt General Lasantha Rodrigo-i shilem agiba noksa nung angur. Bendang linüktem nungi officer cadets 32 densema officer cadets 451-i IMA course renemogo.

PM Modi-i Cyprus, Canada aser Croatia linüktem semdangtsü

New Delhi, June 14 (Agencies): June 15 nungi tenzüka June 19 tashi nung Ato kilonser Narendra Modi-i Cyprus, Canada aser Croatia linüktem semdangtsü, ta Honibarnü ministry of external affairs (MEA)-i metetdaksü.

June 15-16 anogotem nung Ato kilonser Modi-i Cyprus semdangtsü, iba sülen pa Kananaskis, Canada-i oa June 16-17 anogotem nung G-7 Summit senden nung adentsü aser tesüsa June 18 nü pai Croatia semdangtsü.

MEA-i, "Cyprus Tir, Nikos Christodoulides-i jaokba ama Ato kilonser Modi-i June 15-16 anogotem nung Cyprus

semdangtsü. Tesüiba küm 20 tsüingda tang mezüing India Ato kilonser kati Cyprus semdangtsü. Nicosia nung Ato kilonseri Tir Christodoulides den senden amentsü aser Limassol nung business lenirtem den jembitsü," ta metetdaksü.

"Canada Ato kilonser Mark Carney-i jaokba ama Ato kilonser Modi-i Canada semdangtsü aser G7 senden nung adentsü. Iba ya Ato kilonser Modi-i tang agi trokbenbuba G-7 Summit nung shilem agia adener asütsü," ta metetdaksü.

G7 senden nung Ato kilonseri G-7 lenirtem, outreach linüktem nungi lenirtem aser International organisations nungi tongti

ketdangsertem den alima nung tongtibang onüktem nung o lemteptsü, ta MEA-i metetdaksü.

G7 senden aliba mapang nung Ato kilonseri jurila senden-a aika amentsü.

Tatensa June 18 nü Modi-i Croatia semdangtsü aser Ato kilonser Andrej Plenkovic den senden amentsü. Iba ya tang mezüing India Ato kilonser kati Croatia semdangert asütsü, aser ibaji India-Croatia tsüingda tesendaktep nung tongtibang alizüing ka asütsü, ta MEA-i metetdaksü.

Ato kilonser Modi-i Croatia Tir Zoran Milanovic-a ajurua senden amentsü.

India-i Israel aser Iran na dang atsü-anem akatsü ajungshir

New Delhi, Aami/June 14 (Agencies): Tang Israel aser Iran na tsüingda raraba mapang nung Hokolbarnü India-i Israel aser Iran naprongla dang atsü-anem akatsü aser ken o jembiba ajanga mangatettep bentettsü mepishi.

Nikongdang Israel Ato kionser Benjamin Netanyahu den phone ajanga jembidang Ato kilonser Narendra Modi-i region nung yimjung alitsü atema mepishi.

Modi-i X ajanga, "Israel Ato kilonser @netanyahu nungi phone call agizüka liasü. Pai tang tensa indang lemsatep. Ni-a India-i tebilemtsü akaba

lemsatepba den külemi tekaraba nung region nung yimjung nüngdakba lemsatepogo," ta metetdaksü.

Honibarnü external affairs ministry (EAM)-i sangdong ka ajanga, India-i iba tensa mita dang reprangdar aser Israel-i Iran nung nuclear sites amakba metetogo, ta metetdaksü.

"India-i linük anaprongla dang raraba tensa tamajungba mekümdaktsütsü mepishir. Iba tensa tamajungba makümtsü atema ken o jembitsüla aser ketdangsertem tsüingda inyaksangshitsüla. Linük anaprongla den India tesendaktep junga dang lir, aser

akokba tashi yaritsü melunga lir," ta EAM sangdong ajangasa metetdaksü.

EAM-isa, linük anaprongla nung Indian missions-i India sensotem den tongtepratepdar, iba denji külemi item region nung aliba India nunger ajak dang kümdanga alitsü mepishir, ta metetdaksü.

Honibarnep Tel Aviv aser Tehran naprongla nung aliba Indian missions-i linük anaprongla nung aliba India nungertem dang kanga künküma alitsü metetdaksüogo.

Tang Israel nung India nunger 26,000 lir aser Iran nung India nunger 4,000 shi lir.

Air India tayimtsü tsükokba lendongnungasürtem274jungogo

Ahmedabad, June 14 (Agencies): Brihostibarnü Ahmedabad nung Air India tayimtsü tsükokba lendongnung nisung 241 asü aser ka dang kümzük; iba dak alia Ahmedabad nung aliba BJ Medical College nung alirtema nisung 33 shi süogo, anungji tayimtsü nung mena alirtem aser ali nung alirtem ajak senteperbo tang tashi nung nisung 274 asüba jangjaogo.

Tayimtsüji apusoba sülen airport nungi kilometer ana shi dang pilar BJ Medical College campus nung tsükok. College campus nung lia asürtemji doctor tem, parnok kibong züingsemtem, medical students, mapa inyakerter aser tangartem asütsü-a akok.

Brihostibarnü tayimtsü tsükokba mapang nungi tenzüka campus building aser anameket nung tasüangtem bushi tenzüka liasü.

State sorkar ketdangser kati, "Asürtem maittsü jangjatsü atema onoki temang shikem 319 shi DNA tendangtsü atema yokogo," ta metetdaksü.

Tayimtsü nung mena alirtem dak alia college campus nung asürtem rongnung doctor asem aser neuro surgery ka kinüingtsü

densema lir. Ano MBBS student Jay Prakash Chaudhary samar mengui liasü saka Hokolbarnü par kinüingertemi pa tasüang maittsü jangjaogo.

AI 171 tayimtsü tsükokba sülen Hokolbarnü black box ngutetogo. Black box nungji Flight Data Recorder (FDR) aser Cockpit Voice Recorder (CVR) densema lir.

State Disaster Response Force-i tayimtsü nung aliba Emergency Locator Transmitter bo Brihostibar aonungsa nguteta liasü.

Aircraft Accident Investigation Bureau (AAIB)-i tayimtsü tsükokba kuli bushisüingdang tenzükogo. Hokolbarnü Civil aviation minister Ram Mohan Naidu-i, black box ngutetbaji ajanga bushisüingdangba nung tuluka yaritsü, ta metetdakja liasü.

Tayimtsü tsükokba sülen National Investigation Agency densema Central agency aikati lendong atalokba tesemji semdangogo. Iba lendong atalokba nung temelung malemtsüsa kecha mali, ajisüaka iba lendong ya technical timtem ajanga asü meimchir aibelen ajanga tsükokar jangjatsü atema bushisüingdang.

Bihar nung nütsüing shilem 60-i temelenshi aginer: Prashant Kishor

Patna, June 14 (Agencies): Taküm küm tatembanglen Bihar nung assembly election agitsü lia Jan Suraaj party tentetsang, Prashant Kishor-i, Bihar nung nütsüing shilem 60-i temelenshi aginer, ta metetdaksü.

Tesüiba küm ana tashi par party-i state nung yimtsüingtem semdanga nüboyimba dak sendakba nung Kishor-i, Bihar nung nüburtemi pei chirnurtem atema shisaliok aser mapa maongka aginer, ta ashi.

Bihar nung nüburtemi sensak tia, Lalu Prasad Yadav ama lenirtem tsübuba aser BJP agi laaketetogo, ta paisa metetdaksü.

"Tensa melenshidar, ta onoki tesüiba küm ana tashi jembia arudar. Tangbo Bihar nung puti otsü tasen zülutsü. Tesüiba küm ana tashi onoki yimtsüingtem sema senzüogo. Bihar nung nütsüing shilem 60-i temelenshi aginer. Parnoki pei chirnurtem atema shisaliok aser mapa maongka aginer. Nüburtem kanga timtemer. Tanga lenmang maliba den külemi Lalu tsübuba aser BJP ajanga parnok yamai lia aruogo. Tangbo nüburtem atema Jan Suraaj lir," ta pai ashi.

Jan Suraaj Tir, Prashant Kishor-i taruba Bihar assembly election atema nüboyimba dak sendakba nung pai Wazirganj nung lokti senden ka nung jembidang item o ya jembia liasü.

Ano külen tanga osang ka nung, Union Minister aser Lok Janshakti Party (Ram Vilas) Tir, Chirag Paswan-i pai taruba



Prashant Kishor

Bihar Assembly election nung tokteptsü, ta metetdaksüogo.

Arrah nung lokti senden ka nung jembidang Paswan-i, par party-i Bihar nung assembly menden ajak nung NDA teloktep pusemtsü, ta metetdaksü.

Paswan-i, "Ni koba menden nungi tokteptsü? ta asüingdangertem dang ni ya langzür- ozü party, Lok Janshakti Party (Ram Vilas) den ni NDA candidate ajak nem takok ngudaktsütsü aser NDA teloktep tashi itdaktsütsü atema menden 243 nungi tokteptsü. Kü nükjidongji NDA nem takok ngudaktsütsü atema lir," ta metetdaksü.

Taoba Lok Sabha election nung Paswan'er party-i takok junga anguba nung ajemdaker Paswan-i Bihar election nung assembly menden 40 nungi tokteptsü akhanger. Iba dak alia NDA teloktep nung densema aliba Hindustani Awam Morcha (Secular) aser Rashtriya Lok Morcha (RLM) natia menden aika akhanger; ano BJP aser JD (U) napronglai menden noklang kaka nung tokteptsü tebilemba lir.



June 14, 2025 nü Rajkot nung taoba mapang Gujarat chief minister asür Vijay Rupani nem akhüm agütsüba sentong ka nung tangokba noksa nung angur. Brihostibarnü Ahmedabad nung Air India tayimtsü tsükokba lendongnung Rupani densema nisung 241 süogo.



TIR YIMYIM YIMOBILEM (EDITORIAL)

DIMAPUR AMUNGDAY, MAY (AAMI) 15, 2025

Abba, oba

Yisu Khrista dak amangba ajanga asenok Tsüngrem chirtem lir, anungji asenok joko alar ama masü saka techir lir aser asenok Pa chirtem asünungji asenok Pa senmangertem lir ta Galatia tapu 3 aser 4 nung shia angur. Iba nisung ajak atema osang tajung lir. Iba osang tajung ya tanü ama alima ajunga nung tebutem anogo amongba mapang bilemteta pelateptsüba kanga petpeter asütsü ta bilemer. Iba Laishiba nung joko alar ama masü saka Yisu Khrista dak amangba ajanga asenok Tsüngrem chir kümdaktsüba indang asenok nem angatetdaksür. Tetezü asenok tebu mali chirtem ama temenen nung liasü, iba jagi asenok meketa Tsüngrem temoatsü aser rongsen agi sünga lir ser nung asenoki mangu aser magitet, saka tangbo item ajak madakji asenok senmanger kümdaktsüogo ta kasa Laishiba nungjisa shia angur. Aji oda, joko asenok Tsüngrem chirtem asünungji, iba kuliji asütsü atema Pai Pa tanüla asen mulungjangi yok aser iba tanüla jagi abba, oba ta ayimetener. Galatia tapu 4:6 nung 'abba' ta agüja alibaji Aramaic nunger oshi nung oba ta ajaba lir. Ibaji züngshidang, Aramaic nunger o asenok Mongsener na oshi kanga mesüktepa alitsü südi ta bilemer, kechiyong Aoer Mongsenertermia oba dang abba ta ajar. Atangji, oba ta ajatsüba ya maongka tulu lir. Iba maongka jenjang ya tebu malirtemiang tajungba meteta lir. Alima nung 'oba' ta asütsüsa nisung ka maliba tanurji asangchi, anungji pa senmang kecha maka. Tanü alima nung iba ama temeimtsü asangchi chirtem aika lir. Aji oda, abba mesüra oba ta asüidang, nisung shia mulungjangi noksa balala angur. Kar atema obalaji temeim agi sünga aliba nisung, aküm taket, teyarir tajung ka, obalaji timtem mapang jung ama tekümsüker tajung, obala lira kecha metsübur aser ayipajanger. Ano, kar atemabo ashiko obalaji tejashitsüka yi jemer, nüktapangtar, nisung tepseter aser kibong nung timtem aser tejashi bener arutsürang ka asütsüa akok. Ajisüaka, ajak atema tebu tajung ka lir, ibaji kotak nung aliba Tsüngrem, Pa anüng ali madak kibur, anungji takar aser tashi tulu. Paji asen tebu anungji asenok pa chirtem. Aji oda, iba ama tashi tulu akaba Tsüngrem dang abba mesüra oba ta ajatsü agütsüba temeten aser nüjisoji asenok atema taochi kanga tulu lir. Iba jagi asenok alima nung aser kotak nung Pa senmangertem akümer. Anungi, joko asenok tebu maliba taküm asangchi ama melili saka alima aser anüng yanglusang Tsüngrem chirtem ama asenok nümadangdanga lidi. Asenok alima tebuibo asen nüngdak ajakbo peria magütsütettsüa akok mesüra asenok lendong timtem nungi mekümsüktettsüa akok, saka asen kotak tebuibo asenoki kechi meshir aji agütsütsü teti renema lir ta Luke tapu 11 nung shia angutsü. Aji oda, asen Tsüngrem ya kiburtem madak kibur aser tsüngremtem madak Tsüngrem süra, ano Paji tebutem madak Tebu lir. Tanü ama tebutem anogo nung jala jabasotemi obalatem nem tenüngsang agütsü dang obalatemia ali temoatsü senmang aser tanüla tekümtet kotak senmang agütsüsang tebu Tsüngrem dang 'abba, Oba' ta ayimtena tenüngsang agütsütetra, shitakba tebu temeim bilemtetba anogoji aji asütsü. Rom tapu 8:32 nung ashir, Tsüngremi asenok meimba agi asenok alar tia nungi pa senmangertem akümtsü asoshi Pa chir sota meyui asenok nem agütsü. Tanü iba tebu temeim jagi asenok shi temang aser tanüla kümzüka lir. Iba kasa temeim jagi kibong nung jala jabaso kümzüker, apuani kümzüker aser alima nung jangratema lidaktsür külenang, ano, kotak nung tatem maka tepela nung lidaktsütsü. Tsüngrem chirtem koda tepelatsü. Alima tebuibo aibelener saka Kotaker tebuiboibo aibelen masür, alima tebuia tai adoktsüa akok saka Kotak tebu dang asenok nem tekümtet agütsütsü. Iba tepela aser teimla nung tebu Tsüngrem tenüng sanga pai moatsüba tebutem tenüngsanga mongdi.

OLEMSABANG

KOKROKA AKÜMSANG

~ C. Lima Ozüküm, Mongsenyimti

Metongjungki kokroka akümsang oba,
Makamait agi ananger ayip majangsang
Anangpeta chisüng chiyunger lurepa aosang;
Anü luaka ki dangi meshilang kibong khu abensang,
Takari nai mepishiba O magizük;
Oh, Teka tazüng nüktzü ayimsang.
Makamait tongpang agi tebok sünger
Atentena alu wadang nung mechiloker,
Teyariteper mali tzünglu anü chia,
Anak aowi agi ne mang menüpanger;
Jala jabaso mechi ne bok nung teyarong ola adoka,
Yipru mopung kümrem sünemdak ne rongdong süogoni.
Mopungdong nung meyiba süngdong mesüka
Anogodok shisa mesüngjemtet alisang oba,
Tepu shitepa khuret madibangdi reptepa abensang,
Khu tongzüker meliaka wangwanga kümükümshir;
Ayongi anidener ajemalua molu tzü tongdaktsü medem,
Hauni, Oba nai Kü taküm jenjang alizüng tongtsüogo.
Rokzüa atateper oba tanü ne anogo,
Ozü-i süngjang achitsü watemdong nungi
Pelatepa jokdena wainshiner ka mesük;
Meja-i entzü bener ki atong yongya medem.
Oba na ajurutsü senpet lep amer,
Yongyaseta menürema shilanger.
Len tepdanga laoba süng ama ni komamazü
nisung liaka,
Oba, ne tsüngyi ola tatsüng jagi kü taküm azüok;
Haujato, na teka makangba mesonglaba jagi alima süngjem.
Ne shisa taremsük rongtentsü ama aonshi yong,
Ner jala jabasotem anüng petinu tonga yimzür;
Hauni oba, nai züngoktsüba ochi metsüh aka-asojen asor.
Kü tsüngi kü mang titeta kümogo,
Pur medemsor menepa alongtetogo!
Oba ne senti azüh agi kü taküm yangertet,
Ni asoshi na arishi ajema tashi laluyong;
Tanü kü taküm rongnendak sabang nung pelar,
Teyanglur Tsüngrem obalatem arishi talang moajangma.

Kibong yangerba nung tebudi shilem

~ L. Kika Pongener.

Oba ta ajaba tenüng ya Tsüngrem dang ajaba 'Naroküm' tenung ka lir, aser Tsüngrem sulenbo alima nung 'Oba' ta ajatsü temsua aser langa alibaji 'Tebu' ka dangang ajar. Yongji, tebu dang kinungtsüi anir chirnur ajungai 'Oba' ta ajar. Anungji 'Oba' ta ajaba 'Nungja' ya ata-mata ka masü, kanga dang jenjang tulu lir, kechiyong iba ya Tsüngrem melena ajaba 'Nungja' lir. Anungji tebutem ajungai 'Oba' ta ajaba 'Nungja' pei sasa mezüngmeshi masütsüla. Alima nung mezüngbuba loktiliba tera ayangdak kimongji kibong ya asütsü. Kibong ya alima nung mezüngbuba kaket riju asütsü, kechiyong nisung ka taküm nung mezüngbuba shisaliok angazüktsü tenzükbaji kibong nung tenzüker. Kibong nung tekolak aser kiburji 'Tebu' aser 'Kinungbu' asütsü. Anungji kibong nung tebu aser kinungbu ka khuretji kanga tulu lir. Tebu/kinungbu kati kibongji yipro mepong, tsünglu, tsüngsak, anu tatsük, item ajunga nungi kümzüka ayur. Tebu/kinungbu kati kibongji yaa-tzüraa meyutsüi, pei kibong sasep chiyunga jemdakja mesur. Tebu aser kinungbuji kinungtsüi anir chirnurtem ajunga asoshi akümdong lir.

Asenoki laishiba nung tebutem kar nungi lesson kar agitsü merangdi. Yob ya tetemjen, teindang, Tsüngrem tsübuba aser temenen sempaba nisung ka liasü. Pa jabaso tenet aser jala asem liasü. Yob'er jabasotemi parnok ki shia pei ataba anogo nung benjong yanglu, aser parnok den chia ajemtsü asoshi parnok tenu tetsürtem aja. Ajiser, kodang parnok benjong anogoji atem, Yob-i parnok ja-a meshitettsü, aser anogo shia anepongi saaka, parnok ajak asoshi tarungba tenla ka-ka agütsü. Kechiyong Yob-i bilem, ashiko ozü chirtemi temenen menaogo sudi. Yob taküm nungi asenoki lesson tajung ka angubaji, Yob ya pei chirnur atema khuret kanga abenba tebu ka liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Asia Evangelical Leadership Forum senden tembangogo



June 13, 2025 nü South Korea yimtiba, Seoul nung Asia Evangelical Leadership Forum senden tatembangbuba sentong nung taoba mapang World Evangelical Alliance nung General Secretary, Efraim Tendero-i tayongzükba o jembidang tangokba noksa nung angur.

Seoul, June 14, 2025 (Agencies): Hokolbar aonung South Korea yimtiba, Seoul nung Asia Evangelical Leadership Forum senden tembanga Evangelical lenirtemi Asia nung aliba Arogotemi asentenshir Yisu Khristai tenyaba wadang inyaksü atema nangzükogo. Anogo asemnü senden ya June 11-13 anogotem nung "Disciple or Die 2" omen nung ajemdaker agi. Iba senden nung Asia tesem balala nungi evangelical lenirtem adenshia Khristan mission tiyongtsü südaktsür nütsüngsüba wadang amalitepa inyaksü atema asalentong aika renemogo. Forum senden tatembangbuba sentong nung Asia Evangelical Alliance (AEA) General Secretary Dr. Bambang Budijanto aser taoba mapang World Evangelical Alliance nung General Secretary Bishop

Efraim Tendero nati tayongzükba o jembia liasü. Tatembangbuba sentong nung tekülem agiba den külemi linüktem atema sarasademtsü aser Dr. Budijanto-i ketdangsüa Kibuba Benjung agia liasü. Tatembangbuba sentong nung jembidang Budijanto-i, "Tang tensa ya tensa tajung ka masü. Asenok atema joko mapang mali. Arogotemi nütsüngsüba mapa meinyakra Arogo süadoktsü. Asenoki Yisu Khrista dangi tanaben meyiptsüla," ta ashi. Paisa, nütsüngsüba mapa ya Yisu Khristai Pa sülen anidakertem dang tuyuba wadang lir, ta ashiba den külemi Arogotem dang Khrista dang tashi angaba dang nungibo ministry programs tongtibangba kümdaktsüba nungi meyiptsüla, ta ashi. "Khenkhenbo mission ya Yisu dang nungi tuluba

kümdaktsür aser organization ya Yisu dang nungi tuluba kümdaktsür aser ibaji ajanga asenok tanela nung atsüngzüker. Taonung asenoki Yisu nem tanaben bendanga agütsür," ta paisa metetdaksü. Anogo asemnü AELF senden ya anogo shia sarasadem onük balala nung ajemdaker agi. Mezüng anogo nung nung sarasadem omenji "Kü dang Nü sentsüwangshi sayuang" (Anitet 33:18) liasü. June 12 nü sarasadem omenji "Kü dang Nü lenmang sayuang" (Anitet 33:13) liasü aser June 13 nü sarasadem omenji "Kü dang Nü teka sayuang" (Anitet 33:16) liasü. AELF 2025 nükjidongji Asia tesem ajaklen nütsüngsüba mapa inyaksü atema taruba küm 10 asoshi mangdang yur lenirtem longjemer inyaksü atema lir.

Odisha nung Khristantem yimdak nungi aridokba atema nisung 7 apu

June 14, 2025: Odisha nung aliba yimtsüng kar nungi Khristan kibongtem meindokba atema sorkar ketdangsertemi nisung tenet puogo. Khristantemi Khristan yimsü toktsütsü memelungba agi yimdaklirtemi parnok amokmerena yimdak nungi aridoka liasü. June 10, 2025 anogo nunga Koraput district kübok Narayanpatna aser Bondhugaon na nungi Khristantem aridoka liasü. June 10 aonungji tetsür-tanurtem densema tribal Khristantem yimdak nungi aridokba sülen Khristantemji arem nung jenoka liasü. Tasügnüji parnok temeket nung aliba tesemtemi oa medemer aser kinüngertem kidang jenoka liasü. Khristantem yimdak nungi aridokba atema June 12 nü police-i nisung tenet apuba sülen tang parnok

judicial ket nung lir. Osangbener den jembidang United Believers Council Network India nung lenir, putir Pallab Lima-i, "Aibelenertem tekeraba nung apuba atema onoki police dang pelar," ta ashi. Takoksa angur Khristantem den yaritepsang Pastor Bihit Lima-i, "June 10 aonung lokti ka Khristan kibongtem kidangi aoba sülen Khristantem dang, Khristan yimsü tokjang ta tuyua liasü. Ajisüaka Khristantemi memelungba agi ki bensatsü aser yimdak nungi aridok," ta metetdaksü. Khristantemji aonung piyong anasa aliba arem ka nung atsükba sülen tasügnüji parnoki police ajurua ken o benoka liasü. Sorkar ketdangsertemi Khristantem dang nenok takoksa anguba atema nenok nem senotsü teyari agütsütsü, ta metetdaksüogo.

Odisha nung mapangshia yimtsüngtem nungi Dalit aser tribal Khristantem amokmerener aser yimdak nungi meindoker. Delhi nung amenoka aliba United Christian Forum (UCF)-i ashiba agi, 2024 küm kija nung Odisha nung Khristantem anema inyakba tatalokba 40 liasü. 2008 küm nunga Odisha kübok Kandhamal district nung Khristan 100 dak tali tepset, Khristantem ki noklang aika aser Tenla ki aika rongdokja liasü. Odisha nung Khristantem anema inyakba kanga bulua akümba anema June 9 nü ang Odisha nung district 30 nungi district 25 nungbo Khristantemi longkak aita Khristantem nem tamangba yimsü temeden agüjang, ta takhangba agüja longkak aita liasü. Nütsüng million 42 aliba Odisha nung nütsüng shilem 3 shi dang Khristantem lir.

ANOGO ABEN TSÜNGREM DEN

AKANG AKANGA KÜMDAKJANG

"Nenoki tashi mait teka tashi itdakjang, aser tashi mait temokok akang akanga kümdakjang." Isaia 35:3
Nisung temang shilem tashi itdaktsütsü asoshi medical science ajanga yanglutetba vitamin züngdangteta lir. Mozü shitetertemi item mozüji shiba kechi atema nüngdaker repranger tapet agütsür aser pei sasa-a bushia achir. Kechiyong temang shilem ajak tashi itta alinung dang jangratema alir ta metet.
Nisung ka temang shilem nung teka aser tetsüng na kanga tongtipangba lir. Iba ana nung tashi mait kümra tangar teyari nüngdaker. Asenoki itemji arok aroka mebilemba agi aser asen dak matalokba agi shishia mebilemer dangashi tebilemtsü tulu lir. Taküm piyong tangar ka teyari agia alitsüji temela masü aser jangratemtsü maket.
Temeim adianutem, iba temenen lima nung anogoshi temenen tongpang nung nokdaktettsü asoshi tanela nung tashi ita alitsü nüngdaker. Tanela nung tenük telen ajak tashi itdaktsütsü asoshi vitamin mozüji laishiba nung zülua lir. Mozü shiteteter ama Tsüngrem lartemi anogo shia tapet Tsüngrem O mozü ama agütsür. Saka tesasatsü kaji, tashidak tulu agi shiranger sürnung mozü ki aser doctor mebushiba ama tanela nung shiranger saka Tsüngrem aser tenla ki mebushiba tamanger aika lir. Shi aser tanela nung yareta aliba tamanger taküm ka na aser ni masütsü kanga kümdangdi. Kechiyong tangar tamang agi masü saka pei tamang agi alitsü mapang tongogo.

Texas nung gari agi Pastor ka tsükset



June 14, 2025: Texas kübok El Paso nung aliba Rock Faith Center nung associate pastor ka gari agi tsüksetba sülen Arogoi mangyimdar. June 4 nü Mercedes gari kati associate pastor, Jason Owens mena aliba motorcycle nungji tsükoktsüba sülen jena ao aser iba lendong nungji pa asü; pa arrshi küm 49 liasü. Mercedes gari anisang jagi motorcycle dak tsükotsüba sülen jena oadok; tang tashi gari anisang maitsüji mejangjar. Iba tatalokba sülen pa hospital-i anir ao, saka meküzmükteti asü. Arogoi sangdong ka ajanga, "Owens ya medemer tajung ka aser ozü Arogo nung kanga tongti lenir ka liasü. Pa tamang jenjang, pa dak temeim aketba aser Pai Kibuba meimba ajanga

nisung aika kongshiogo," ta metetdaksü. Arogo nung tongti Pastor C. Eric Hallback-i, "Onoki tejashi tulu nung ozü pastor Jason Owens alima nungi pilaba osang sangdonger. Pastor Jason ya Tsüngrem nem bendanga agütsüba tenzüker ka dang masü saka medemer tajung ka liasü," ta metetdaksü. Paisa, "Pai Khrista osangtajung prokba aser ajemalua tangar tenzüka ajanga tatishitsü tajung sayuogo. Pa alibaji teti temoatsü liasü, aser tang pa meliaka pa taküm ajanga asenok maneni ajungmesotsü," ta lemsatep. 2 Timoti 4:7 Lai tekong nung ajemdaker Arogo pa nem tetushi agüja, "Ni rara tajungji raraogo, ni alizüng tonga asemogo aser ni tamangji yuogo," ta metetdaksü. Pastor Owens-i talisa lanurtem anitet, Child Protective Services inyak aser Fort Bliss anasa sepai kibongtem rongnung tenzüka liasü. Pai Tsüngrem tenzüksü jangraba den külemi motorcycles-a kanga meima liasü. Par kibong aser pa meimertem nem tesünep agüjang ta sarasademdaksüner, ta Arogoi mepishia metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tenüngsang**

(adv) junger ta shia tushiba (praise)

* Takok angur nem ajaki tenüngsang agütsür.

Tenütsü

(n) tejak nung tenük ser tema temang shilem (forehead)

* Kü dak tenütsü nung tarak keta lir.



Tir Yimyim

OLONG PAITEP # 7182

1		2				3		4		5
				6						
	7		8							
9					10			11	12	
				13		14	15			
16					17			18		
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. --- tatsü - (3)
12. Tebur kidong aser zünga kasatsüngdajatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7181 TELANGZÜBA**TIPIEN :**

1. Menungra, 6. Orak, 7. Mimong,
8. Aika, 11. Rata, 14. Tiyazü,
16. Anembong.

LANGTSÜNGLEN :

1. Medemer, 2. Nusem, 3. Nisung,
4. Aoksa, 5. Tapok, 9. Azüpong,
10. Timtem, 12. Aginü, 13. Anema,
15. Apuso.

NAI-A YA METETTER MA

"Most premature surviving quadruplets" atema Guinness World Record nguteta alirtemi May 31, 2025 nü arishi küm 1 ajungba anogo mungogo. Bryant quadruplets - Lainey, Kali, Lennon, aser Koen nunger ya hopta 23 ser anogo 4 nung dang University of Alabama at Birmingham (UAB) Hospital nung aso.

May 31, 2024 anepdang maternal-fetal aser neonatology specialists 30 shi kati Becca Bryant dak emergency cesarean section ajanga tanur pezü ya patet. Lainey, Kali, Lennon, aser Koen nunger ya anogo 115 jelia asoba lir.

Assam sorkari Kaziranga National Park expansion agiener**Guwahati, June 14, 2025**

(Agencies): Assam sorkari Kaziranga National Park and Tiger Reserve 9th addition atema sangdong agütsüba meyipa agiogo.

Wildlife Protection Act of 1972 nung Section 35 kübok iba

lemtet agi aser protected area ulushitsü atema September 2, 2020 nü sangdong agüja liasü.

Ajisüaka, sorkari 9th addition sangdong agienogo aser iba ya 2570.00 hectares (approximately 25.7 square kilometers) shi atema liasü.

Iba ali ya Sonitpur District kübok Tezpur Revenue Circle nung liasü aser riverine landscape ka lir.

Iba ali nung Asiatic Wild Buffalo, Rhinos, Elephants, and Tigers, deer, hare, turtles, snakes, wild pigs, aser ozü tapu balala lir.

March 17, 2019 nü iba tesem nung güntok pezü aliba bushiteta liasü.

June 9, 2025 nü Special Chief Secretary to the Assam Government, Environment, Forest and Climate Change Department Mahendra Kumar Yadava-i cancellation indang sangdong nung sign asü.

Meghalaya secretariat anasa 200 metres nung sentong magitsü tuyur**Shillong, June 13, 2025**

(Agencies): East Khasi Hills district administration-i Shillong nung Meghalaya Secretariat, Additional Secretariat, aser Raj Bhavan dena tongtipang sorkar kiojentem anasa metre 200 telongtet nung lungkak aitba sentongtem magitsü metetdaksüogo.

Inner Line Permit (ILP) pusemertemi Secretariat jakdang lungkak aitba

sentong ka agiba sülen ghonda ishika lir sorkari iba tetuyuba agütsü.

Ibala sentong ajanga traffic nung timtem agütsütsü, nisung tali adenshitsü aser tensa raksatsü akok ta District Commissioner RM Kurbah-i ashi.

"Ibala sentongtem agitsü temelaba agütsüra, nisung senzusenbongba nung timtem ajurutsü, aser law & order

raksatsü akok" ta pai ashi.

Sorkarisa sensotem aser telok ajak dang iba tenokdangba sülen anidaksü aser sorkar lemozüka aliba tesemtem nung ang public sentongtem agitsü metetdaksüogo.

Meghalaya nung ILP tenzüksü takhangba maneni agüja arur aser mapang shia civil society groups-i iba dak sendakba sentongtem ayonga agir.

NEC-i Manipur nem Rs 6.19 crores agütsüogo**Imphal, June 14, 2025**

(Agencies): North Eastern Council (NEC)-i May 2025 nung Manipur nung mapatong 9 inyaksü Rs 6,19,49,507 agütsüogo.

Iba osang ya NEC yearbook 2025 ajanga ashir aser iba nung North Eastern Region nung terenlok mapa balala inyakba osangtem shia lir.

NEC-i IGNTU-RCM, Kangpokpi district, Manipur nung multi-facility centre yanglutsü atema Rs. 82,34,979 agütsü.

Parnokisa Integrated farming system model demonstration atema Rs 37,50,000, Zeme Tousem sub-division nung Backward community atema Rs

62,61,500, Luangrang (Nungnang) nung mini stadium atema Rs 2,00,00,000, livelihood skill development technology intervention training program cum workshop and exhibition kouna craft (water reed) atema Rs 8,00,000, SC/ST boys and girls hostel atema Rs 59,73,750 agütsüogo.

Bodoland nung Adani Group nem ali agütsüba magizüker**Guwahati, June 14, 2025**

(Agencies): Kokrajhar District nung thermal power plant ka yanglutsü atema Adani Group nem ali bigha 3600 agütsüba magizüker ta Nikhil Bharat Krishak Sabha (AIKS) aser All India Youth Federation (AIYF)-i metetdaksüogo.

Iba inyakyim ya Indian Constitution nung Sixth Schedule anema lir kechiyong ali ya Bodoland Territorial Council (BTC) ketdangsübaren

kübok lir ta telok anati ashi.

Iba lemtet ajanga Boro, Garo, aser Rabha amala lisopur kintemi tetsükdaksü ajurutsü. Non-tribal outsiders nem tribal land agütsüba ya magizüker" ta AIKS-i ashi.

"Iba ama tensa ka nung United People's Party Liberal (UPPL) kechi inyaker? Parnok nija ajangzüksü atema BTC nung alirtem ashioktsür masü na? UPPL-i nübortem den külemi noktaksüla aser ali agütsüba meyipa

agidaksütsüla" ta AIKS-isa asüngdang.

"Mikir Bamuni Solar Project ajanga mapa balaka madok. Parnoki power magütsür. Mikir Bamuni nung alirtemi parnok ali akoksa, mapa mangu aser tilateri mapatem inyaker. Iba amaji BTC nung matalokdaksütsü" ta AIKS-isa ashi.

AIKS-isa telok ajak longjemmer ibala tashiyim lemtettem anema noktaksü ayongzükgogo.

Iran-i meyiper Israel dak missile aika khaloktsü



Iran o Israel na tsüngda raradang raksaba noksa angur.

Tel Aviv, Aami/June 14 (Agencies): Israel-i anüing ajanga parnok tsükchir Iran amakba sülen Honibar anepdang linük ana yagi kati ka maktepogo. Nuclear weapon nokdangtsü nükjidong nung Israel-i iba linük maka liasü.

Tel Aviv aser Jerusalem na densema Israel kübok tesem balala nung air raid sirens ola agütsü aser iba ajanga nübrtem tejenokdak bushia jenshia liasü. Iran-i missile aika khaloktsü aser kasa mapang nung Israel air defence system-i item missile tem ya khadangtsü meranga liasü.

Israel nung tebur ka aser tetsür ka tepset aser aika yiruja liasü. Missile ka parnok aliba ki anasa tsükba sülen iba lendong ya ataloka liasü, ta Israel indang ambulance service-i ashi.

Tel Aviv tezülen Rishon Lezion yimti nung apartment building ka ajareper aliba nung teküzmükertemi nüburtem kümzüksü meranga liasü.

Israel indang Defence Minister Israel Katz-i Honibarnü ashiba agi, civilian dak khalokja Iran nunger lenirtemi alimela inyakogo aser iba atema tah aika aotsü.

Yemen nungi Iran-i teyari agütsüba Houthi teloki yokba missile kati Israeli-occupied West Bank nung tanur asem densema Palestine nunger pongu tepseta liasü, ta Palestinian Red Crescent-i metetdaksü.

Iran nung manger mesangwa tsüngda linük yimtiba Tehran nunga bomb aika apokba angashiogo, ta semi-official Tasnim news agency-i metetdaksü.

Fars news agency-i ashiba agi, missile ana agi Tehran indang Mehrabad airport dak kongshi aser Iran nunger media osang balala ajanga ashiba agi, iba airport nung mi adoka liasü. Iba airport ya Iran nunger lenirtem aliba tesem anasa lir kong, air force base ka amenoka

lir aser fighter jets aser transport aircraft tem yua lir.

Iran indang U.N. envoy Amir Saeid Iravani-i ashiba agi, Israel-i anüing ajanga Iran amakba mapang military ketdangsür tejen ka densema nisung 78 tepsetogo aser nisung 320 dak tema yirutsüogo, shirnok timba civilian liasü.

Hokolbar aonung rara tenzükba sülen Tehran-i Honibar anepdang anüing ajanga Israel kübok tesem balala maka liasü, ta Fars-i metetdaksü.

Parnoki anepdang züngia lia Israel indang commercial hub Tel Aviv amak aser iba yimti nung missile tem apokba ya Jerusalem nungaia angashia liasü, ta tenük kuli agütsürtemi ashi.

Israe-i Hokolbarnü commander tem, nuclear scientist, military target aser nuclear site tem amakba atema telangzüba agüja Iran-ia Israel maka liasü. Iran-i parnok indang uranium enrichment ya miima weapons programme ka benoka inyaka aliba nung shilem ka masü ta shia arudar.

Hokolbarnü Iran-i yokba missile tem khadangtsü atema U.S. military-ia teyari agüja liasü, ta US nunger ketdangsür anati ashi. Israel-i ashiba agi, Iran-i Hokolbarnü missile 100 mejungi khaloktsü aser item missile tem ya timba ka khadangogo, mesüra metongjungi tsüka liasü.

Israel-i anogo tepeyong Iran amakba aser Iran-a meyiper missile tem khaloktsüba ajanga parnok meketa aliba tesem nung mangatettep tuluba adoktsü ta tsübua bilemer. Ajisüaka Gaza nung Iran den sendaka aliba Hamas aser Lebanon nung Hezbollah telokbo Israel-i raksatsüogo.

Iran indang state news agency IRNA-i ashiba agi, Israel-i Iran indang ali telung nung yanglua aliba nuclear site ka maka tongtibang military ketdangsür tepsetba sülen

Tehran-i Israel dak ballistic missiles noklang aika khalokja liasü.

Israel nunger ketdangsürtemi ashiba agi, Natantz raksatsüogo, saka koba tashi ka raksa aji tang tashi mejangja aser jangjatsü atema mapang tatsüka agitsü akok. Iba tesem nung civilian atema amshitsü asoshi masü saka nuclear bomb ka yanglutettsüsa uranium enrich asüba atema anüolen aliba linüktemi Iran aija arudar.

Natanz nung tema nung yanglua aliba pilot enrichment plant bo raksatsüogo, ta U.N. nuclear watchdog tekolakba Rafael Grossi-i Hokolbarnü Security Council dang ashi. Paisa, Israel-i tanga facility ana amakba indang osang UN-i tangang bendendar, ta ashi.

Rara tenzükba atema Iran lenir Ayatollah Ali Khamenei-i Israel aitsüogo. Iran nunger ketdangsür tejen kati ashiba agi, Israel nung koba tesem nung südir süaka kümzüka malitsü aser mangyangbaji tashi asütsü.

Kasa mapang nung Iran-i parnok amakba nung US-a dena lir ta ashiba den US-i khuret ajak abentsü ta ashi.

Israel indang U.N. envoy Danny Danon-i ashiba agi, anogo ishika tsüngda Iran-i bomb aika yanglutsü atema fissile material yanglur lila ta itangitertemi osang agütsüogo. Paisa, Israel-i iba jenjang agiba ya linük kümzüka ayutsü atema lir.

Iran-i parnok indang nuclear programme ya civilian nüngdaka atema dang lir ta shia arudar. U.N. nuclear watchdog-i iba hopta ashiba agi, Iran-i global non-proliferation treaty kübok parnok tinyaktsü minyaki aibelenogo.

U.S. tir Donald Trump-i ashiba agi, parnok indang nuclear programme dak sendakba nung tenangzüktepba ka yanglua Israel-i parnok amakba anendaktsütsü temeno mali.

Russia-i Ukraine nunger sepai tasü mang 1,200 agütsüogo

Moscow, Aami/June 14 (Agencies): Rara tenzükür küm asem dak tema aoba mapang Russia-i rara nung asüba Ukraine nunger sepai 1,200 tasü mang Kyiv nem bendanga agütsüogo.

Taoba ita Istanbul nung yimjung atema sensaksemba mapang nangzüktepba ama Hokolbarnü item tasü mangtem bendanga agütsüogo.

Ajisüaka Mosco-i ashiba agi, tasü mangtem parnoki dang agütsü aser Ukraine-i Russia nunger sepaitem tasü mang magütsü.

"Tanü Russia-i Ukraine nunger sepai 1,200 tasü mang Ukraine nem bendanga agütsüogo. Ajisüaka onok nembo ka danga magütsü," ta source kati Russia indang state meyong TASS news agency dang ashi.

Russia tir nem teyari agütsüsang Vladimir Medinsky-ia, Ukraine-i kecha rasa meshi-i ajungbena dang June 7 nü tasü mang aser tepuokertem melenteptsü sentong aliba thinena liasü.

Ukraine indang Coordination Headquarters for the Treatment of Prisoners of War-i Hokolbarnü, parnoki agizükba tasü mangtem maitsü

jangjatsü atema forensic experts tem inyaksangshi tenzüktsü ta ashiba den tasü mangtem ya Ukraine nunger sepaitem tasü mang asütsü ta amanger, ta shisem.

Iba hopta tetenzüklen Russia-i tasü mang 1,212 agütsü aser Russia nunger sepai tasü mang 27 agizüka liasü.

Tensa mejungi liaka linük anapronglai tasü mang 6000 melenteptsü aser shiranga aliba aser kanga mejungi yirur aliba sepaitem aser iba den arishi küm 25 tekübok aliba tepuokertem chioktsü atema mulungtepogo.

Inyakyim balala benoka inyakba mapang linük anapronglai kati ka maneni maktepdar aser linük anaprongla nung nisung asüba osang agütsüogo.

Russia kübok Belgorod tesem nung küm ana tain tebur chanu ka tepset aser tetsü densema nisung tain ana yirua liasü, ta Governor Vyacheslav Gladkov-i ashi.

Zaporizhzhia nung Governor Ivan Fedorov-i ashiba agi, Russia-i bomb pokloktsüba mapang nisung ka tepset aser nisung asem yiruja liasü. Donetsk nung Governor Vadym Filashkin-i ashiba agi, civilian ana tepset aser pongu yiruja liasü.

Iraq-i shishilembatsü aser nüburtem senzüsenpong atema Syria crossing lapokshiogo



Shishilembatsü aser nüburtem senzüsenpong atema Iraq-i Qaim border crossing officially lapokshiogo

Anbar, Aami/June 14 (Agencies): Shishilembatsü aser nüburtem senzüsenpong atema Iraq-i Qaim border crossing officially lapokshiogo, ta Iraqi border authority otongdar kati Honibarnü ashi. Iba ajanga linük ana tsüngda tesendaktep akangshitsü aser shishilembaba asüngsashitsü.

"Qaim crossing ya khu abenba gari aser nüburtem senzüsenpong atema lapokogo," ta otongdar yagi Reuters dang ashiba den, Iraq aser Syria nunger ketdangsürtemi külemi security jenjang asadangba sülen iba crossing ya lapokshia liasü, ta shisem.

Syrian Foreign Minister Asaad al-Shibani-i Baghdad semdanga Iraq dang arrtsü aden shishilembaba tenzükshitsü mepeshiba sülen ita asem lir iba jenjang agiogo. Tir Bashar al-Assad atsingtoktsü atema nüburtemi apusoba sülen iba crossing ya shibanga liasü.

Iraqi border crossings ketdangsürtem sangdong ka

ajanga ashiba agi, Syria nunger indang truck mezüngbuba Honibarnü crossing adenogo aser iba ya Iraq aser Syria na rongsenketzüng nung tesendaktep akangshitsü atema kanga tongtibang jenjang ka asütsü.

Iba crossing lapokba ajanga Baghdad aser Syria nung lenir tasenba tir Ahmed al-Sharaa na tsüngda tesendaktep tajungba akümba temaitsü sayur, shibai kidangertem den diplomatic aser rongsenketzüng nung tesendaktep amenokshitsü atema merangdar. Iraq nunger ketdangsürtemi ashiba agi, al-Sharaa tir akümba sülen sorkar ana yagi arrtsü nung security aser shishilembaba dak sendakba nung tesendaktep akangshiogo.

"Iba crossing ya Iraq aser Syria na tsüngda osettsüset balala shishilembatsü atema tongtibang corridor ka asütsü," ta al-Qaim jila mayor Turki al-Mahallawi-i ashi. Iba jila nung border post ya amenoka lir.

ALI AYOKER

Indisen, Dimapur nung ali tayoktsü lir : 160 ft x 40 ft
Tagineri yangi tongtepratep südaktsüner : # 6909718060

Mokokchung Fitness Revolution 1.0 sentong agi



Mokokchung, 14 June (TYO): Mokokchung Fitness Revolution 1.0 ta sür 'power paradox' omen nung ajemdaker tetoktepba sentong ka yangi Assam Rifles ground Mokokchung nung kaogo. Iba sentong ya Mokokchung District Bodybuilding & Fitness Association (MDBFA)-i ayongzük.

Meimchir asoshi anema aliba den temang shitak ayutsüba kanga tongtibang lir,

anungji, Mokokchung nunga iba tsütsü ajungkettsü nükjidong yur iba fitness revolution sentong ya ayongzük, ta MDBFA tir-i metetdaksü.

Iba sentong nung MDBFA kübok aliba gym 7 den ano tejangrartem nisung noklang ka shi adenshia shilem agia liasü. Asaya telemsaji - Arm Wrestling (tebur) below 75 kg, Arm Wrestling (tebur) above 75 kg, Arm Wrestling (tetsür), CrossFit (tebur), CrossFit

(tetsür), Men's physique, push up (tebur), strong man, tug-of-war, itemji liasü. Takoker nem sen den kulikaket agi senpettsü.

Mokokchung District Bodybuilding & Fitness Association ya taküm ang Mokokchung District Sports Council (MDSC) nung züngok ta MDBFA tirisa metetdaksü. Iba sentong nung MDSC vice President, Martoshi-i tajungshi o jembi.

South Africa-i World Test Championship kokogo

Aami/June 14, 2025 (Agencies): Honibarnü World Test Championship final nung South Africa-i wicket pongu agi Australia koka tang mezüngbuba tongtibang asayamung ka kokogo.

Küm 27 merandangba sülen South Africa team-i tang mezüngbuba international asayamung tongtibang ka kokogo. 50-over aser T20I format nung 18 ben tashi merandangba mapang South Afric team-i taoba küm T20 World Cup nung dang final tonga liasü, saka iba asaya-a parnoki mekoktet.

Lord's nung pezünübuba South Africa pur asayar 2 out sür run 213 yanglur lia asaya tenzükshi aser asaya akoktsü atema run 69 nüngdaka liasü.

Australia captain Pat

Cummins-i Honibarnü asaya tenzük tasembuba over nung Aouth Africa captain Temba Bavuma out süja liasü. Bavuma-i run 66 yanglu.

Iba sülen asaya akoktsü atema run 41 nüngdaka aliba mapang Mitchell Starc-i Tristan Stubbs out sütsü aser iba ajanga South Africa nunger asayartem tera mesüngjemteti kümdaksü.

Ajisüaka iba asaya nung century yanglusang Aiden Markram, shibai Hokolbarnü kanga junga asayaba sülen maneni Honibarnü junga asaya liasü pai run 136 yanglua par team jenjang kanga junga kümdaksü.

Iba asaya nung Markram kijai century yanglua liasü, saka pa Josh Hazlewood-i ball aonba mapang mid-wicket nung Travis Head-i catch out sütsüba sülen pai

par team atema tatembangbuba run meyangluteti liasü.

Iba sülen David Bedingham aser Kyle Verreynne nati süngjemshir asaya-a South Africa team takok dangi ani. Starc-i ball aonba mapang Verreynne-i cover leni ball züktoka run ka agi aser Iba sülen asaya koka liasü.

West Indies' puri 1984 küm run 342 menepa asaya akokba sülen South Africa puri tang iba asaya akokba ya Lord's nung Test asayaba mapang run timtiba menepba rongnung tanabuba lir.

Kasa mapang nung South Africa pur ya World Test champions akokba team tasembuba kümogo. New Zealand (2021) aser Australia (2023) nati WTC mezüngbuba aser tanabuba koker lir.

Kevin de Bruyne Napoli nung denogo

Aami/june 14, 2025 (Agencies): Taoba Premier League season tembangba den Manchester City toktsüba sülen Belgium nunger midfielder Kevin de Bruyne Napoli nung denogo.

Iba club nung pa taoba Chelsea aser Tottenham manager Antonio Conte den longjemtsü, shiba iba club head coach lir.

Pa free transfer nung Italy-i aoer aser Major League Soccer club Chicago Fire-i pa nem maongka agütsüba De Bruyne-i magizük. Napoli nung adenba tetezü pa taruba season Champions League asayatettsü.

Napoli-i arishi küm 33 tain asayar den tenangzüktepba yangluba ya computer-generated noksa ka ajanga sangdong, kong pa korang ka semer chuba menden nung



Kevin de Bruyne

menalir. Noksa den "King Kev is here" ta zülutsür liasü.

2015 küm Wolfsburg nungi Manchester City nung adenba sülen pa iba club nungi küm 10 asaya liasü aser iba mapang pai takok marok 19 benogo.

Manchester City nungi pa asaya 422 nung asayaogo aser iba mapang goal 108 idakja liasü.

City puri Premier League titles trok, League Cups pongu

aser FA Cup ana akokba aser 2023 küm Champions League akokba mapang De Bruyne-i club nem teyari tulu agütsüogo.

Pai club toktsütsüba osang ya season mademdang sangdong aser May ita Bournemouth den kidang tatembangbuba asayaba sülen pai club tokja liasü.

City-i De Bruyne melena AC Milan nungi Tijjani Reijnders aser Lyon nungi Rayan Cherki alizükogo.

Parnok taruba season Champions League nung De Bruyne den asayatsü akok, kechiyong Belgium nunger asayar ya maneni temaba jenjang nung asayatsü tenangzüktepba yangluogo.

Napole nung pa taoba mapang Premier League midfielders Scott McTominay aser Billy Gilmour na den longjemogo.

Indian Army nung asayar ama züngoksemtsü jaoker

Dimapur, Aami/june 14 (TYO): Indian Army nung Agniveers ama züngoksemtsü atema Nagaland nung temsüa aliba tebur asayartem asoshi maongka tajung ka aliba indang Nagaland Olympic Association (NOA)-i metetdaksüogo.

Assam Regimental Centre, Shillong den longjemer special recruitment drive ka ajanga asayartem ya shimtsü.

Recruitment ya teküboklen agüja aliba asayatem atema sempet aketba asayartem atema asütsü.

Asayatem:

- * Basketball
- * Cross Country
- * Handball
- * Hockey
- * Karate
- * Shooting
- * Swimming
- * Volleyball

Recruitment Rally ya 2025 küm Juny ita hopta tasembuba nung agütsü. Rally ya Assam Regimental Centre, Shillong nung agütsü aser iba atema

Initial Screening (Nagaland) ya 2025 küm June ita tasembuba hopta Kohima nung agütsü.

Rally atema shimertem nem tatembangbuba rally magi tsüngda renemshia atatsü asoshi training agütsütsü.

Rally nung shilem agütsüpurtem ya arishi küm 17½ nungi 21 tsüngda alirtem asütsüla. Asayartem 45% aggregate aser subject ajak nung 33% nungbo class 10 pass sür alitsüla. Rally nung shilem agütsüpurtem ya tar 160 cm aser temang tozük seret 48 asütsüla aser teku: 77 cm (with minimum 5 cm expansion) asütsüla.

Affiliated sports associations ajak dang temsüa aliba candidate tem jangja parnok nominate asütsü aser June 18 nü tashi nungbo tejangrartem tenüng agütsütsü mepeshia metetdaksüogo.

Iba ya asayartem atema maneni asayayonga aoba den külemi linük tenzüksü atema maongka tajung ka asütsü.

ISSF World Cup: Arya Borse-Arjun Babuta nati gold angu



Aami/June 14, 2025 (Agencies): Honibarnü tang asaya aliba ISSF World Cup nung India nunger tarep temeyoktep asayar Arya Borse aser Arjun Babuta nati 10m air rifle mixed team event nung gold medal nguogo.

Final nung tenati China nunger tarep Zifei Wang aser Lihao Sheng na 17-7 agi koka liasü.

Borse aser Babuta nati pressure nung kanga junga asaya aser China nunger team ya kanga junga kokteta liasü.

India nunger tarep yagi qualification nung tena senteper 635.2 ngua gold medal asaya atema qualify süa liasü. Wang aser Sheng nati 635.9 ngua world record yangluba tenati 0.7 agi dang metongteti liasü.

Qualification round nung kija asayaba mapang Borse-i 317.5 agi dang metongteti liasü.

Taküm küm tetenzüklen

Lima, Peru nung World Cup asayaba mapang Borse aser Rudranksh Patil nati 10m air rifle mixed team event nung silver medal ngua liasü.

Iba asaya nung India nunger tarep Elavenil Valarivan aser Ankush Jadhav nata asaya aser tenati point 631.8 nguteta trokbuba nung tembanga liasü.

Norway nunger tarep Jeanette Hegg Duestad aser Jon-Hermann Hegg nati USA nunger Sagen Maddalena aser Peter Matthew Fiori na 16-14 agi koka bronze medal nguogo.

Honibarnü Arya Borse aser Arjun Babuta nati medal ka anguba densema India nunger asayartemi iba world Cup nung medal pezübuba aser gold medal tanabuba nguogo. India nunger rongnungi Suruchi Singh-i gold angu aser Sift angu aser Babuta-i 317.7 ngua liasü.

BILEMDANGANG

"Minyakra nükjidong ayubajia amajok."